

01 JUN 1998

DR MAHATHIR BERLEPAS UNTUK LAWATAN KERJA KE JEPUN

KUALA LUMPUR, 1 Jun (Bernama) -- Perdana Menteri Datuk Seri Dr Mahathir Mohamad berlepas ke Jepun untuk lawatan kerja pagi ini dan dijadualkan berucap pada dua persidangan penting berkaitan ekonomi Asia Timur dan masa depan Asia.

Antara yang hadir di Lapangan Terbang Sultan Abdul Aziz Shah, Subang untuk mengucapkan selamat jalan kepada beliau ialah isterinya Datin Seri Dr Siti Hasmah Mohamed Ali, Timbalan Perdana Menteri Datuk Seri Anwar Ibrahim dan beberapa menteri Kabinet.

Dr Mahathir dijadual menyampaikan ucapan utama pada simposium kelima Institut Hal Ehwal Kewangan Antarabangsa, badan gabungan Tabung Kewangan Antarabangsa (IMF) di Tokyo esok.

Ucapannya adalah berkaitan "Penggiatan Semula Ekonomi Jepun dan Asia Timur."

Mereka yang dijangka menghadiri simposium itu terdiri daripada menteri dan pemimpin korporat.

Perdana Menteri juga dijadual menyampaikan ucapan pada Persidangan Nikkei pada hari Khamis yang bertema "Masa Depan Asia."

Persidangan itu diadakan pada setiap tahun sejak 1995, bertujuan mengukuhkan lagi persefahaman antara Jepun dan negara-negara Asia.

Dr Mahathir dijangka pulang pada Jumaat ini.

-- BERNAMA

ARA AZZ RI